

SMTI eksperti: O'zbekiston Turkiy davlatlar tashkilotiga a'zo mamlakatlarning muvofiqlashtirilgan transport siyosati va o'zaro bog'liq logistika infratuzilmasini rivojlantirishni qo'llab-quvvatlaydi



Joriy yil 12 noyabr kuni O'zbekiston Prezidenti Shavkat Mirziyoyev Turkiy davlatlar tashkilotining 8-sammitidagi nutqida transport va tranzit sohasidagi hamkorlikni tizimli asosda yo'lga qo'yish zarurligiga e'tibor qaratdi, deb ta'kidladi O'zbekiston Respublikasi Prezidenti huzuridagi Strategik va mintaqalararo tadqiqotlar instituti (SMTI) bo'lim boshlig'i Alisher Qodirov.

- Jumladan, hamkorlikning ushbu yo'nalishlaridagi mavjud salohiyatdan to'laqonli foydalanish maqsadida davlatimiz rahbari «Turkiy davlatlar tashkilotining transport sohasidagi o'zaro bog'liqlik dasturi»ni ishlab chiqish tashabbusini ilgari surdi, - dedi ekspert. Bunday dasturga ehtiyoj so'nggi paytlarda O'zbekiston va boshqa turkiy mamlakatlarda transport infratuzilmasini rivojlantirish, transport yo'nalishlarini diversifikasiya qilish, tranzit bilan bog'liq jarayonlarni soddallashtirish borasida salmoqli ishlar amalga oshirilgani bilan bog'liq. Biroq turkiy davlatlar transport tizimining integratsiyalashuv jarayoni to'liq yakunlangani yo'q.

Shu munosabat bilan O'zbekiston rahbari tomonidan taklif etilgan transport sohasidagi o'zaro bog'liqlik

dasturi tegishli infratuzilmani yaratishda tashkilotga a'zo mamlakatlar faoliyatini muvofiqlashtirishni takomillashtirishga qaratilgan.

Avvalo, bu turkiy davlatlar hududidan o'tuvchi transport yo'laklarini tizimlashtirish, ularning hududida transport harakatini ko'paytirishga ko'maklashish, transport yo'laklarining jozibadorligini oshirish, mamlakatlar transport infratuzilmasining ilg'or rivojlanishini rag'batlantirish ishlarini amalga oshirishdir.

Turkiy davlatlar transport kommunikatsiyalaridagi ayrim «bo'shliq»larni bartaraf etish ham muhim ahamiyatga ega.

Ba'zi to'siqlar va «uziq» yo'naliishlar saqlanib qolayotgan avtomobil va temir yo'llar, dengiz va havo yo'llaridan tashkil topgan eng muhim transkontinental xalqaro transport yo'laklari «turkiy makon» hududidan o'tadi.

Shuni inobatga olish kerakki, Yevropa va Osiyo o'rtaisdagi eng qisqa transkontinental yo'naliishlar turkiy davlatlar orqali o'tadi, shuning uchun ularning birlashuvi va integratsiyalashuvi nafaqat tranzit yuk tashish hajmining oshishiga olib keladi, balki Yevroosyo qit'asining barcha mamlakatlarining rivojlanishiga faol hissa qo'shadi.

Shu nuqtai nazardan, ko'plab davlatlar va mintaqaviy iqtisodiy bloklar «Sharq-G'arb» va «Shimol-Janub» yo'naliishlardagi xalqaro transchegaraviy transport yo'laklari, shuningdek Xitoyning «Makon va yo'l» tashabbusi doirasida o'zaro hamkorlik qilish uchun Turkiy davlatlar tashkiloti bilan hamkorlikka qiziqish bildirmoqda.

Shu bilan bir qatorda, ushbu hamkorlikning istiqbollari va mazmuni ko'p jihatdan milliy chegaralarni transport vositalari orqali kesib o'tish jarayonini murakkablashtiruvchi turli xil to'siqlarning mavjudligi bilan belgilanadi. Turkiy tashkilotlar o'rtaisdagi chegaralarda bojxona va chegara tartiblarini soddalashtirish biznes xarajatlarini kamaytiradi, xalqaro savdo va tranzit tashish hajmini oshiradi. Transport infratuzilmasining takomillashtuvi xorijdan investitsiyalarning sezilarli kirib kelishiga sabab bo'ladi.

Bu do'stona aloqalarning yanada kengayishida muhim ahamiyat kasb etadi, shuningdek turkiy davlatlar o'rtaisdagi muvaffaqiyatli hamkorlikning samarali mexanizmi uchun qo'shimcha turtki bo'lib xizmat qiladi. Ularning geostrategik ahamiyati oshadi, transport yo'naliishlari diversifikatsiya qilinadi. Buning natijasida turkiy mamlakatlar global ta'minot zanjirlarida yanada chuqurroq integratsiyalashish va tovarlar xalqaro tranzitida faol ishtirok etish imkoniyatini qo'lga kiritadi.

Eng muhimi - transport o'zaro bog'liqligi tovar ayriboshlashni yengillashtiradi. Transport aloqalari rivojlanishining tabiiy natijasi sifatida turkiy davlatlar o'rtaisdagi kooperatsion hamkorligini mustahkamlanishiga olib keladi.